



王良齋文集卷之三

常熟王

峻次

山著

長洲蔣

棨誦先刊

傳

楊維斗傳

楊廷樞字維斗吳人孝子大滌子舉崇禎庚午鄉試第一自為諸生即以文章氣節負重名倡應社於吳中與太倉張溥張采等諸名流分經立課集漢唐以下諸儒義疏傳說辨其源流得失為文章

必傳經義力矯世俗詭譎之習四方學者奉為楷
模因其所居臯里稱臯里先生領解後聲譽益盛
門弟子著錄者二千人初周順昌被逮廷樞身左
右之幾被禍甲申聞變北向慟哭誓以死殉福王
立貽書執政所言十事皆天下大計奄黨阮大鍼
者崇禎時廢居金陵復社士為南都防亂揭討之
大鍼遣使求解於廷樞廷樞拒不納至是大鍼方
得志欲修宿怨御史王實鼎阿大鍼意上復社渠
魁疏專指廷樞將搆大獄會南都破事得解乙酉

後隱居鄧尉山不復入城市丁亥四月蘇松提督
吳勝兆反為之運籌者戴之儁廷樞門人也事敗
連廷樞被執於舟中賦絕命詞十二首裂衣幅作
遺書自題其後曰吾自少讀書慕文信國之為人
今日之事乃其志也五月朔巡撫土國寶會鞠於
蘆墟泗州寺廷樞南向挺立國寶好言相慰命雍
髮廷樞終不屈乃殺之臨刑大呼曰生為大明人
行刑者急揮刃首墮於地復曰死為大明鬼時年
五十三門人私謚忠文先生

錢牧齋傳

錢謙益字受之常熟人萬歷三十八年進士第三授編修尋丁父憂天啓元年補原官主浙江鄉試遷左中允初謙益登第時黨論方起與同年生韓敬不相能至是敬以行人考察罷家居令人詭稱謙益門客徧授關節於士之有文者榜發有錢千秋者得所授俚俗詩七字分置七義結尾爲給事中顧其仁所摘謙益亦自檢舉法司戍千秋謙益坐奪俸因移病歸四年起爲左諭德進少詹事魏

忠賢羅織東林諸人謙益以黨魁削籍歸崇禎元年召爲詹事轉禮部右侍郎十一月大學士劉鴻訓罷詔會推時禮部尚書溫體仁以望輕不與侍郎周延儒方以名對稱旨謙益慮其先已也力尼之二人皆銜刺骨體仁遂借浙閩舊事訐謙益不當與閣臣選帝見會推無延儒名已不能無疑及體仁疏入次日召對閣部科道諸臣於文華殿命體仁謙益皆入謙益不虞體仁之劾已也及廷辨體仁氣益厲言如湧泉而謙益辭頗屈時助體仁

者止一延儒廷臣皆言謙益無罪吏科都給事中
章允儒爭尤力帝怒下允儒獄并切責諸大臣即
日罷謙益官命議罪允儒及給事中瞿式耜御史
房可壯皆坐黨謙益降謫千秋獄上謙益坐杖論
贖竟廢不用而延儒體仁遂相繼入閣矣家居九
年體仁讐之不釋奸民張漢儒者揣知其指遂訐
謙益及瞿式耜家居不法事體仁擬旨逮二人下
刑部獄嚴訊謙益危甚求解於司禮監曹化淳漢
儒偵知之告體仁體仁密奏帝請并坐化淳罪帝

以示化淳化淳懼自請案治乃盡得漢儒等奸狀
及體仁謀獄上帝始悟體仁有黨於是漢儒及其
黨陳履謙王璠俱立枷死體仁遂去位謙益式耜
得放還十七年四月京師陷報至謙益赴南京與
諸大臣議立君謙益欲立潞王議未定而鳳督馬
士英及劉澤清諸將擁福王至福王立士英與阮
大鍼用事謙益懼不見容遂附二人得為禮部尚
書又上疏頌士英且為大鍼訟寃修好然二人終
疑之狂僧大悲獄起大鍼欲假以盡誅清流造為

十八羅漢五十三參之目謙益亦列焉士英不欲
與大獄戮大悲而止順治二年五月 王師定
江南謙益入朝以禮部右侍郎管秘書院學士事
尋以老病乞歸四年復以江陰黃毓祺事牽連下
獄事白得釋康熙三年年八十三卒謙益顛頓仕
途立朝不滿五載當時忌者謂其標榜黨人把持
朝局然以文章擅天下又與楊李文黃諸正人友
善雖見廢而名不衰惜乎縈情利祿溺志聲色不
克保其晚節其於書經史百家下及稗官釋典無

一不讀盡能驅使詩宗少陵出入韓白義山蘇陸
元虞諸家文法韓歐下逮金華震川旁及六朝初
唐才力富健兼綜衆長嘗論有宋淳熙以後以腐
爛爲理學其失也陋有明弘正以後以剽賊爲古
學其失也俗於李何王李之模擬鍾譚之詭僻排
擊不休至李東陽之詩歸有光之文則力推奉焉
海內以其言爲質的厥後攻之者雖多然才思之
雄亦無有能及之者家有絳雲樓藏書甚富晚歲
里居以明史自任屬橐未就一夕悉燼於火乃歸

心佛乘以自遣云

顧亭林傳

顧炎武字寧人初名絳崑山人贊善紹芳孫諸生同應仲子出後從叔同吉生稟異質自幼篤志古學九經諸史皆能背誦年十四為諸生入復社有名明季屢試不遇見時多故遂棄去舉業屏居山中講求經世之學取家藏經史累朝實錄及天下

郡縣志書一代奏疏文集徧閱之有得即錄積四十餘帙名曰天下郡國利病書後以貢薦授兵部司務再薦職方主事皆不就明亡後絕意仕進北游齊魯燕趙西入關中所至交其賢豪長者考其山川風俗古今治亂之迹證以金石碑碣自是聞見益廣凡所論述皆上下古今貫穿精核卓然成一家言當代咸推為通儒性耿介絕俗少與同邑歸莊齊名有歸竒顧怪之目嗣母王未嫁守節及聞國變不食而卒臨終誡炎武以世食明祿毋仕

二姓炎武奉母教厲節終身每念故國舊君發為
詩歌悲壯激烈展謁諸陵至於再三晚寓關中庚
申元日作一對曰六十年前二聖升遐之歲三千
里外孤忠未死之人其老而彌篤如此卒年七十
無子學者稱亭林先生所著書共數十種日知錄
三十二卷積三十餘年而成於經義史學官方吏
治財賦典禮輿地藝文之屬一一疏通其源流考
正其誤謬最有補於學術世道者於六書音義尤
有獨得撰古音表三卷易音三卷詩本音十卷唐

韻正二十卷音論三卷統名音學五書大學士李
光地以爲自漢晉以來所未有二書皆久行於世
又文集六卷詩集五卷并左傳杜解補正九經誤
字石經考金石文字記吳才老韻補正昌平山水
記等諸雜著皆門人潘耒梓行其天下郡國利病
書一百卷肇域記一百卷及二十一史年表歷代
宅京記等書又百餘卷並藏其甥徐乾學家今多
散佚

徐俟齋傳

徐枋字昭法號侯齋長洲人少詹事沂長子少有
才名年二十一舉崇禎壬午鄉試南都失守沂將
殉國枋日夜號泣欲從死沂曰吾不可以不死若
長為農夫以沒世可也乃奉父命拮据營葬遁跡
不出初居鄧尉山中後隱靈巖之上沙土舍數椽
讀書其中布衣草履終身不入城市家貧常賣畫
自給雖藜藿不繼而莫能強以一錢之餽平日往
來同志數人外雖至戚罕得見面時以枋與宣城
沈壽民嘉興巢鳴盛為海內三遺民川湖總督蔡

毓榮慕其名具書致名藥厚幣託幕下友馮羽道
意謝不受遺書馮生略曰僕年二十四守先人沒
世之言長往避世今已五十一矣親知故舊都謝
往還絕問遺顧敢與當世之公侯卿相通交際邪
且當世之公侯卿相亦安用此衰悴廢民為也幸
為我善辭以安我素拜賜多矣睢陽湯斌撫吳尤
欽其節嘗屏騶從兩詣山中訪之卒不得見歎息
而去所著居易堂集二十卷文辭健拔大抵主於
扶世教植綱常無一諛墓應酬之作又有二十一

史文彙通鑑記事類聚讀史稗語讀史雜鈔建元
同文錄管見等書山水宗董巨間法兒黃當其得
意自謂前無古人書善行草俱為世所重康熙甲
戌年七十三卒

黃端木傳

黃向堅字端木先世自常熟遷吳父孔昭字含美
崇禎癸酉舉人明末授雲南大姚知縣罷官後兵
阻不得歸流寓白鹽井教授自給音問隔絕向堅
家居日夜涕泣目盡腫順治八年十二月拜祖墓

別妻子誓不得父母不歸攜一囊一蓋獨行冰雪
中涉溪踰嶺自武岡而西從間道出洪江關歷鎮
遠平越至貴陽為孫可望戍兵所執疑為間諜將
官程萬里者詢知其故歎曰孝子也給以令符乃
得前其間懸崖絕壑豺虎蠻箐兵馬之虞無所不
歷繭足黧面幾死者數明年五月尋至白鹽井得
北父母留五月奉二親歸明年六月始抵里門吳
人以其事播之樂府世所傳萬里緣傳奇是也還
家後孝養二十年而母歿孔昭優游林泉為吳中

耆舊年九十無疾而終向堅年六十五矣猶孺慕
哀號尋以病卒乾隆四年巡撫許容 題旌

楊易亭傳

楊无咎字震百一字易亭父廷樞死國難时无咎
年甫十二痛未從死杜門隱居歷八十年如一日
與澗上徐枋崑山朱用純稱吳中三高士三人皆
以先人死忠以名節相砥礪者也先是无咎嗣叔
父廷楨後及執廷樞喪泣血三年或疑非降服之
禮无咎曰先人大故非尋常人之喪其親者比禮

以義起予天下之鮮民雖終身喪可也當廷樞被
難日賴門人吳江進紹原力得收殮後歲時家祀
必以紹原配享徐枋臨歿以孤孫相託无咎不避
嫌怨卒保其孤家貧藜藿不充廷樞門生故舊遍
海內或登華要无咎義不往閒有以書幣招者亦
謝不應也所著談經錄辨析經傳譌謬多前人所
未發其補正三易卦位圖說獨探千古不傳之秘
詩文稿有楊仲子三百篇及小宛集年八十九卒
學者私謚正孝先生

徐立齋傳

徐元文字公肅號立齋崑山人太僕少卿應聘曾孫少端重有大志與兄乾學秉義倡為古學順治己亥進士第一授修撰甚被恩遇會江南奏銷案起姦胥竄名其中謫鑾儀衛經歷居四年事白復為修撰丁外艱歸康熙己酉起元官進侍讀主試陝西所錄多單寒力學之士明年遷國子祭酒尋充經筵講官元文以養士莫大於太學極陳納粟之弊請做順治時舊例於郡邑各庠選取文行

兼優者及每科鄉試副榜送監肄業部議著為例在監四年規例嚴肅學政大飭侍講經筵敷陳剴切多所啓沃進內閣學士改翰林學士教習庶吉士丁母憂歸己未召監修明史仍為內閣學士庚申擢左都御史時滇孽將平元文疏陳善後之宜以安反側又疏請除三叛虐政俱下九卿議初御史劉安國請察隱占田畝部議凡察出者分別甄錄州縣官利其升叙多捏報累民元文力言其弊凡欺妄害民者請加等科罪自以身總風紀

尤以澄肅吏治為務疏劾福建總督姚啓聖妬功
害能啓聖皇恐待罪乃免又條列督撫不職四弊
時捐納漸廣吏途益雜元文再疏爭之滇南既定
疏言保泰之道詞甚切直事關八旗者人多不敢
言元文獨持之嘗劾浙江副都統高國相藐法害
民得

旨察審將軍馬哈達以民間多匿逃人
請自勾攝不移有司元文不可曰必不得已當令
督撫會同將軍

上從其言府部院寺筆帖式
三千人求開例捐納典州縣滿大臣以好言相勸

元文力持不可卒從其議而罷二十二年大計羣
吏元文掌計典一切餽遺不敢及門是年舉行軍
政請命提鎮次第入覲以重閫寄是後提鎮悚息
多請陞見又言滿洲漢軍官員丁憂者宜無分內
外一體守制二十七月外官丁憂不許候代治事
又請申行律文居喪釋服作樂筵宴嫁娶之禁候
補御史蕭鳴鳳居喪挾妓久不回旗劾罷之在臺
三年數條上便宜知無不言不畏強禦俄坐舉湖
北按察使不當鑄三級將歸有 旨留京專領

監修明史二十七年復起左都御史遷刑部尚書
尋改戶部銳意革除舊弊胥吏無所措手部中肅
然二十八年五月拜文華殿大學士仍兼翰林院
事明年兩江總督傅臘塔希忌者意疏劾元文兄
弟鄉里事元文奏辨遂力求罷以原官致仕舟過
臨清權關者欲搆其罪登舟大索惟圖書數千卷
而已家居未一年病卒年五十八元文立朝三十
年清介剛直始終一節有古大臣風天性孝友篤
於師友與兄乾學並好獎誘後進而性方嚴不苟

言笑動必以禮每與其兄異趨所著有含經堂集
三十卷

汪鈍翁傳

汪琬字茗文長洲人少孤自奮讀書五行俱下舉
順治十二年進士觀政通政司假歸銳意為古文
辭以起衰自命尋授戶部主事分司大通橋進員
外郎改刑部遷郎中河南民張潮兒以報母讐殺
其族兄三春巡按御史論潮死琬為復讐論引律
文罪止杖為據以奏銷案降北城兵馬司指揮兵

馬司秩卑職冗左官者多偃蹇不屑意琬剛直不
撓理寃誣決疑獄懲奸豪任滿去民炷香攜酒送
者塞道復為戶部主事權江寧西關倉以病假歸
結廬堯峰山益閉戶著書家居九年以博學宏詞
召試授編修與修明史在史館六十日撰史藁百
七十篇即杜門稱疾踰年仍告歸歸十年而卒年
六十七琬之為文根柢六經浸淫史漢取法唐宋
元明諸大家立言命意皆有所本嘗自言吾文從
廬陵入非從廬陵出於易書詩春秋三禮喪服咸

有發明其叙事尤有法度一時名公鉅卿誌銘表
傳必以琬為歸性伉直不能容人過雖賢人文士
交遊遍天下而忌之者亦衆自知不容於流俗故
前後閑居二十餘年泊然自樂也所著鈍翁類藁
百十八卷自刪定為堯峰文鈔五十卷並行於世

韓慕廬傳

韓莢字元少別字慕廬長洲人祖治父翻世有文
行莢少失母從父讀書研精經史貫穿百家不屑
為俗儒章句剽竊之學已而孤貧益甚乃入京師

康熙十一年由國子監生中順天鄉試明年會試殿試皆第一授修撰初制科之文士子承明季餘習頗傷繁縟後降而為空疎浮滑自莢出而文風翕然一變尋充日講官纂修孝經衍義主乙卯順天鄉試歷贊善侍講侍講學士擢內閣學士莢在館閣凡應奉文字多出其手

聖祖眷注方

深而是時南北分黨徇機將發莢中立無倚決計勇退遂以疾請假歸家居八載黹六經凡漢唐宋儒箋疏章句靡不采獲而裁其中於史稱馬班

陳壽文宗唐宋六家詩尚唐音將著書以老三十年復

召還朝

命充一統志總裁遷禮

部右侍郎仍掌翰林院學士調吏部

命教習

庶吉士三十九年陞禮部尚書掌院教習如故再疏乞歸不許卒於官年六十八莢和平樂易以文章荷

上知未嘗自矜與人言訥然不出口及

遇大事持論侃侃不阿當

廷試日吳三桂逆節

已萌莢對策力言三藩當撤無少瞻顧永定河臣請廣開捐納事例莢獨持不可祭酒阿理瑚請以

故大學士達海從祀孔廟莢言達海造國書一藝
爾於從祀之典未合御史鄭維孜請令監生各回
原籍應試莢言如此則太學一空非京師首善之
義及議海關不當設各關稅不當增私錢禁不當
過嚴所建白甚多待故舊不以貴賤異視獎拔後
進如不及初入監時受知於祭酒徐元文壬子鄉
試主考徐乾學實拔其文莢敦師生之誼及兩人
致政家居終日憂患平時故人門生避禍絕迹莢
挺身周旋百端慰藉卒亦無事也所著有懷堂集

二十卷詩六卷

何義門傳

何焯字岷瞻長洲人為諸生即負盛名所選制義
行遠集為學者所宗康熙乙丑拔貢入都屢試不
售壬午冬以李光地奏薦 賜舉人明年會試

下第再

賜進士選庶吉士入直南書房尋

命侍讀藩邸兼修書武英殿丙戌散館得

旨

再教習三年旋丁外艱歸癸巳冬再以光地薦召
赴闕仍直武英殿明年授編修乙未秋坐藩邸舊

事逮問尋奉

旨免罪仍直武英殿壬寅夏以

修書積勞卒年六十二

上下詔軫憫

贈

侍讀學士

賜金歸葬

命有司存恤其家

焯穎悟強記博覽羣籍長於考訂評閱古人之書必尚論其世疏通證明其剖析疑難指摘譌謬區別妍媸皆獨具手眼不少假借插架萬餘卷悉手自點勘見人有善本必借歸參校尤精小學字畫源流無不洞悉書法出入晉唐正行入能品性狷介不肖詭隨見人文章好譏議少許可以此每招

人忌其教人爲文最謹法度故游其門者多學有原本不苟合於時有集數卷繫獄時門人懼袖投諸火歿後人爭購其遺書雖殘縑斷簡莫不珍惜焉

程氏兩世孝行傳

懿孝先生諱大儒字遠之徽州郡學生也父諱遇德南渡時官內閣中書先生隨父在金陵乙酉五月父殉節先生與母汪孺人奉父柩歸阻兵不得達由姑孰抵安慶屢乏食每夜匿蘆渚中覓魚蝦

野蔬以供母泣禱余忠宣祠冀早歸一夕風雨大作舟忽解侵曉已至京口乃徙蘇州依外舅朱氏一日朱氏子娶婦盛裝飾夜半盜劫之誤入先生室持刀向汪孺人先生以身蔽母復以手格刃血流仆地盜感其孝竟釋去貧困授經以脩脯供甘旨而妻孥饜藜藿養志者六年母卒晝夜號泣兩目失明又寢苦三年得瘳疾遂不起年七十五里人私謚懿孝

介菴先生諱文煥字豫章國學生懿孝先生子也

懿孝哭母失明時先生方六歲日爲父舐目歷五年障翳復開弱冠遊學京師念親老即歸父疾劇徒步延醫新安六晝夜走七百里兩足盡腫先後罹父母憂毀瘠幾不勝喪既卜葬築室廬墓傍旦夕悲號哀動行路出入必告非婚祭大事不歸如是者三十年季逾大耋遇祭時猶躬捧盤匭悽愴追慕卒年八十七乾隆五年巡撫張公渠疏上父子並荷 旌表祀虎邱二程夫子祠

舊史氏曰夫子有言孝悌之至通於神明孟子曰

大孝終身慕父母二者皆非世人之常孝也方懿
孝先生泣禱余忠宣祠耿耿血誠惟冀父柩與母
氏獲全而已乃一念上通遂使一夕風送千餘里
此豈人力所能哉介菴先生為父病篤覓醫故鄉
徒行七百里斯時非有神相之亦幾殆矣至於哭
母失明寢苦得疾弱齡舐目白首廬居庶幾所謂
終身慕親者余故樂書之以風世焉

勿藥居士小傳

居士姓王氏名繼良字眉樞常熟縣貢生其號勿

藥者蓋壯歲嘗有疾用以自祝中年後久無疾矣
乃偶感疫氣不旬日而遽歿年五十八里中重君
者相與涕泣哀之以余知君最深請為之傳始余
年十七八時與君同受業於今見復陳先生君長
余二歲風神秀朗倜儻不羈時游酒人淋漓酣飲
不醉無歸然能折節讀書為文安詳有法又潔清
自守不屑與勢利人馳逐以故一時文士多樂與
君交家本梁溪遷虞尊人孫讓先生勤儉謙和以
淳德稱有腴田四五頃差足自給所居邑東郭下

書室三楹明窗淨几圖史鼎彝羅列楚楚庭中菽
蘭蒔花暇日相訪坐其中熟名香進茗茗相與劇
談古今事每使人流連不忍去其於經史百家咸
涉其津詩律工穩細膩書宗唐人行楷秀整兼諳
鼓琴既久困場屋益專意於詩花晨月夕卽事多
欣勝地名山輿到輒往亦時借榻僧寮與老禪靜
衲結世外契人謂君雖不遇於時而其所樂有富
貴人不能奪者晚節心益平行益醇太孺人行年
八十有六君孝養備至自八十以後每歲孟春具

酒食會親友捧觴上壽年五十時所生子痘殤立
弟之子如玉為後課以讀書既得子猶龍視如玉
仍無異所生待親黨有恩為人謀事必盡忠病亟
時惟以不能終養老親為憾分撥產業琅琅屬付
無少偏私語弟佩芝以小心守分處今世之道已
問相知某某來否遂不復言其於死生之際灑然
無累又如此余少寡交游所常往來者君與亡友
宋玉才一兩人而已康熙己亥余始游京師四年
中頻走塞外鬱鬱不得意君有書來言病胃連年

曾作寄懷詩有曰黑山秋老思君夜三徑依然北
郭居當風塵困頓旅舍無聊時追念舊游未嘗不
神往也乾隆戊午余丁內艱歸十餘年來里中故
交益稀惟吾師見復先生暨君與老友東淑輩歲
時過從相得甚驩余又身嬰痼疾家貧不能杜門
常扶病授課於外間從外歸接君談笑時一解悶
今君又先吾去矣正昌黎所謂人欲久不死而觀
居此世者何也君有詩集吾師既序而傳之矣余
非能傳君者惟道其實不飾一辭使後世欲知君

之為人者觀此可得其概焉

行狀

府君健修先生行狀

嗚呼痛哉不孝峻宦游二十年未嘗一日養親自
聞先妣唐太孺人訃後哀傷得疾六載於今重以
兩弟先後病亡熒熒子立舉目伶仃猶幸府君年
雖高精神尚健庶幾菽水承歡優游暮齒孰謂竟
棄不孝而長逝邪侍疾以來魂驚魄散五內摧裂
瀕於死者屢矣顧念府君一生善行孚於宗親信

於州里鄉黨身歿之日聞者無不歎息倘不具述
本末垂示將來則不孝之罪滋大用敢洒淚濡墨
略陳梗概冀 當代大人先生俯賜採擇焉府君
諱志學字少陵一字健修先世本江北人元末徙
居常熟明初有仕者五世祖時猶藏數世冠帶真
容後失傳家益式微子孫至不能舉其諱字府君
每為不孝言之輒欷歔淚下曾王父振亭公曾王
母倪氏始以今從叔父古香公官馳贈奉直大夫
永安州知州宜人先王父君選公諱應祥謹厚弱

不勝衣犯而不校鄉里稱善人先王母宗孺人仁
孝勤儉享年八十有七積德彌厚以不孝官馳贈
文林郎翰林院編修孺人府君為先王父第三子
天資孝友為人耿直尤好行善事為童子時遇生
物輒買放鮮果必種其核家素貧窶少多病年十
八九聯十金會作脩脯資從師發憤讀書晝夜不
怠未幾先王父暨先伯父母相繼下世府君與先
王母孤姪三人獨居貧至不能舉火乃廢書改業
求升斗養親及先妣唐太孺人于歸不孝生五歲

三世五棺猶在殯府君力勸先叔祖奉直公共襄
大事日走虞山上下相地嘗深夜獨行山巔竭力
購築兩塋葬祖父兄嫂先王母自寡居後長齋三
十餘年日誦佛書夜躬紡績稍餘即以布施先妣
亦甘淡泊習勤苦府君承顏定省室無交謫饘粥
不繼怡然也先伯父母歿後從兄維賢始數齡府
君撫之如己子長為授室予以祖父所遺今兄先
歿嫂垂老其子亦成立矣曾伯祖無後柩寄祖塋
暴露年久府君惻然別具棺斂骨以葬四時家祭

亦與焉春秋掃墓念族姓稀少從叔父又久宦在
外西北山兩塋及叔祖父母殯舍常以一身任之
此府君一生事親敦本之大凡也不孝六七歲始
入鄰塾府君訓督甚嚴侵早呼之起夜歸問所讀
書為陳說大義稍長習舉子業即令遠從名師不
孝資庸下性又好嬉念府君先妣期望甚至減衣
食為脩脯資始感奮自勵補諸生後連困場屋生
計益艱會從叔父館蔣文肅公家以修書得官將
出都寓書招往時不孝方成婚兩月府君遂命遊

京師雍正癸卯不孝舉順天鄉試明年成進士由
中書選庶吉士尋充書館纂修府君感念 國恩
手書誡曰吾家本單寒汝一旦登科第歷清華皆
由上天垂佑祖宗積德所致汝當竭忠盡職以上
報 聖明揚名顯親之道不外乎此若瞻顧身
家營求非分縱得高爵適貽父母羞吾向好善愧
力微德薄自今益勉行以畢吾願而已其後寄書
率常類此不孝在翰林十餘年硜硜自守不敢稍
隳其節者實稟家訓也素奉佛道每月朔望及斗

降日持齋晨誦經夜禮斗未嘗懈倦遇有善事必
引為己責不盡力不止康熙四十六七年水旱相
仍府君與先王母日出錢糴麩雜粉作大餅
千百枚施餓者家故半菽未充也雍正十年海溢
傍海難民流移入城府君率里中劇金人給棉衣
及錢即家中分發衆至如歸所居方塔前道路為
擁塞虞山巖石秀麗為兩邑之鎮然長僅十餘里
舊禁採石近年姦民競利公然結隊燒鑿損傷冢
墓山為之殘府君不忍坐視屢告當事勒碑嚴禁

累年始克就立碑之日冒大風雨往來山之西北
因此病黃疸半年然採石之禁卒賴以行他如刊
布善書勸世助當事盡心散賑施藥放生全人骨
月濟人急難息爭解紛消有事為無事自壯至老
不可數計里閭鄉村識與不識無不信服府君者
性不喜浮華言多率直見素不相知人不解作寒
暄周旋語聞人好言飾說多信以為然故亦或為
人所欺育嬰堂者數年前府君聞他處多奉
旨建設以塔地居兩邑之中倡議買僧舍改作當

事已具牒申憲矣顧以工費重大連歲未舉今秋
有勸府君再向當事請行者欣然與俱已而其人
見助者頗多即攘去別謀建南門外府君歎人情
叵測益感憤欲成之遂典衣借貸獨出七十餘金
先建大門及堂而伙助者卒少以此日常鬱鬱致
疽發右耳後不孝竭力延醫調治竟至莫挽嗚呼
痛哉府君少遭窮困讀書未就然明於大義好觀
史書往事每遇忠孝義烈之士流連往復津津樂
道閒吟詩雖或聲調不諧而真樸處多自在流出

少喜彈琴中年未暇操習今夏買琴一張將理舊
曲以娛老今琴故在不孝尚忍覩耶鄉風惡薄賭
博尤甚府君深惡痛絕生平未嘗一近衣服惟取
布素衣食不願過豐年近八十未嘗用杖早起晏
眠不肯一日稍耽安逸凡此皆令士大夫之所難
可以垂法子孫者獨憾不孝前此浮沈薄宦於吾
母已抱終天之痛歸里以來又以家貧之故惟藉
研田以供甘旨不獲朝夕常侍左右疾發之前無
由先事護持馴至今日不孝之罪尚可逭哉府君

生於康熙六年十一月十一日丑時卒於乾隆八
年十月二十四日丑時享年七十有七以今

上登極覃恩封文林郎翰林院編修配先妣唐太
孺人 勅封孺人明忠臣葉令堯仁公後瑞甫

公女年七十前卒平生懿行詳府君所撰行略子
三長即不孝峻雍正癸卯 恩科舉人甲辰科進
士由翰林院編修改授協理山東道事江西道監
察御史加二級娶馮氏候選經歷保之公女次嶠
前歿娶繆氏介臣公女次嶸國子生亦前歿娶沈

氏貞士公女女三一適庠生鴻遠徐公子國子生
以省一適候選縣丞景菴夏公子候選州同知之
龍一適佑賢范公子珩孫男五本仁今沒本義俱
嶠出本禮聘徐氏國子生正履公女次本智俱不
孝峻出本信礫出孫女三一許字考授州佐嘉穗
朱公子聲不孝峻出二礫出未字不孝苦次荒瞽
語無倫次伏異大人先生覽而憐之賜以銘誅庶
吾父潛德幽光不至終于泯沒死且不朽
艮齋文集卷之三

王艮齋文集卷之四

常熟王 峻次山著

長洲蔣 榮誦先刊

頌

聖主躬耕藉田頌 有序

皇帝御極之三年二月辛亥率羣臣躬耕藉田禮
也惟我 世宗憲皇帝重農敦本歲歲親耕
為天下先自三代盛王以還未之有也 皇帝
大孝三年亮陰而敬事 天地宗廟加惠下

民蠲租勸農湛恩滂流德教洋溢今肇行大典恩
禮有加宜有撰述以摹臣庶之歡心揚太和之景
象臣職在拜颺不辭固陋謹獻頌曰

惟天生民育之在食惟君養民先知稼穡翳惟藉
田國之鉅典代有儀文克勤則鮮禮經所垂有待
明聖於惟

世宗殫厥誠敬三推加一歲修

以教爰及我

皇承以大孝三年不言言必為

民或蠲之租或除其緡或平其糴又賜之困如春
之澤如天之仁仁惠既周人各含哺

皇帝曰

咨其勤本務九州牧伯郡縣長吏勤課農桑咸喻
上意惟三年春時大和懌慶賜畢行遂耕帝藉吉
日辛亥大陳鹵簿禋於農壇爰即田所天田砥平
百爾雲從各襄厥儀肅肅雍雍其儀維何鞭左耒
右其數有常三五及九王卿飲之庶人終畝勞賜
禮成小大稽首於斯之時神人胥浹霖霖應期祥
風翕習咸願自今時暘時雨嘉禾九穗登我簋簠
普天率土有富無窶孝弟力田風俗還古凡此諸
休由

皇之德勤求賢良屏遠聲色常懷永圖

無安逸樂監於舊章慎乃興作
方以寧至治馨香永觀厥成

一人恒勞萬

聖駕臨雍頌

有序

惟我 國家尊師重道稽古右文自

列聖

表章絕業崇祀尼山鉅典隆儀超越記載

皇

上生安天縱道備君師曩者典學宮中金聲玉振
兼綜條貫嗣位以來文教誕敷人材蔚起德澤涵
濡萬物咸遂三年春百禮具興遂有事太學釋奠
畢御彞倫堂宣講經書維時百辟師儒聖嗣賢裔

暨太學諸生濟濟咸在禮成恩賚溥加臣身綴班
末親親 聖天子穆穆之光多士園橋之威大

雅所美靈臺鼓鐘鎬京辟雍文武作人雅化不難
復見於今漢之永平唐之貞觀夫何足云謹拜手
稽首而獻頌曰

赫矣 皇清天啟文明

聖聖相繼集厥

大成於穆我 皇紹承景運學入聖域動合古

訓即位三年化周寰宇曰養曰教次第以舉乃詔
司空大新辟雍輝輝黃瓦煥若紫宮 帝曰欽

哉朕將親詣惟尼山之德

皇祖考之制始

遇上丁躬行舍菜遂考盛儀先期齋戒季春之初
時惟大昕 鸞輿至止紀事肅陳潔我籩豆馨

我酒醴有穆其容咸秩其禮莘莘胄子橋門雲集
聖裔儒臣陪位鵠立乃御彛倫命敷講席司成司
業拜手振策稽古放勲下及孔氏唐虞至治中庸
至理邈矣微言後先一揆 帝曰俞哉勉爾多
士禮儀既備錫賚滂洋聲覃海外澤派宮牆惟聖
之道待人而傳其在於今如日中天惟 皇之

德欽明文思為君為師裁成萬類凡在臣子是訓
是行億萬斯年共襄太平

墓表

廣東道監察御史見南顧先生墓表

先生諱楷仁字晉裴號見南姓顧氏長洲人孝靖
先生諱天朗之孫河南巡撫宗人府丞諱沂之子
也世系事蹟具詳京江張相國崑山徐司寇所撰
兩代墓碑中先生為宗丞公長子生而端靜勤業
無綺襦紈袴之習年十六補邑諸生早擅文譽康

熙丁卯舉順天鄉試庚辰成進士癸未以行人考
選擢雲南道監察御史掌江南道事戊子告歸省
親庚寅春以父命赴補廣東道監察御史協理河
南道事辛卯秋丁宗丞公憂明年又丁母張夫人
憂服闋遂不復出家居二十四年年七十一卒先
生之在臺每事盡職其稽察錢局也商人辦銅不
以時至因倡收廢銅以資鼓鑄之議先生洞燭其
弊執正不撓議亦因之中止其巡察通京兩倉也
例以二八月支放時一至先生往視甚勤適京倉

火災單騎往救指揮得宜及奉處分遂獨得免議
五城事繁南城尤甚先生巡視南城剖決明敏治
事悉詣公署未嘗一訊於私邸前此陋規力行裁
革夜巡非漏盡不歸一時奸宄屏跡事關民命尤
加詳慎每當秋朝兩審取各省揭帖摘錄小冊自
隨少有出入輒力爭駁正時趙恭毅公官揔憲目
為後生可畏漂陽史官詹贈以詩曰天下稱平于
定國殿中執法狄兼謨此其立朝之大畧也少侍
孝靖公在家四世一堂周旋左右能得其歡心及

隨父京邸遭曾祖母歿孝靖殉孝宗丞公聞訃驚
痛欲絕先生宛轉扶持得以無恙既連遭內外艱
喪葬大事必誠必信歲時祭享淚涔涔不止嘗手
錄祖先忌辰生日酌定祭規以示子孫曰一部禮
經喪祭居半人知報本反始自去不肖遠矣初孝
靖公之變一日兩喪其禮為先儒所未詳當日崑
山徐公京江張公兩相國酌定設位之次訃帖之
序奠祭之主深得變禮之正先生慮其久而失傳
為著兩喪行禮節畧及連幕圖以為遭變之式也

如梓行祖父詩文集藏弄先世手澤皆其承先之
大者家居雖久屏跡不入公門嚴束家人毋預外
事然遇當事諮訪民間利病必昌言無隱厚遇宗
黨周恤友朋善行不可枚舉生長高門而性甘淡
泊每戒子孫禁紛華絕奔競嘗曰俗奢示儉吳下
尤有關繫不必問外論云何也其家範之可法又
如此嗟乎世道之交喪也皆由士大夫寡廉鮮恥
在朝則脂韋干進到老不休居鄉則驕矜縱恣見
惡閭里求如先生之潔身勇退履行無玷者不少

概見雖未究其所施亦可以挽頽風而繼前修矣
先生生於康熙四年正月二十四日卒於雍正十
三年二月二十一日娶李氏封孺人左都御史木
菴公女子三長文煥前卒次文煥文煒孫八士堯
士基士圭士堅厚璽厚垓厚坤厚墀孫女四曾孫
九曾孫女三先生以丙辰十一月葬於彭山距今
十一年矣文煥等以隧道之碑未立具狀來請余
忝臺中後進素慕高風遂次第其言以為之表

墓誌銘

陶退菴墓誌銘

先生姓陶氏諱貞一字駿文又字改之晚自號退
菴其先自崑山徙常熟世有隱德六傳至先生之
父昌化公諱元淳康熙戊辰進士以文章政事擅
名海內世稱子師先生終廣東昌化令先生其長
子也性識聰悟少就家塾與令弟太常相鏃礪聲
聞浸遠康熙戊子舉順天鄉試壬辰成進士選庶
吉士讀國書如素習明年散館授編修念母鮑
宜人年高思致菽水歡投牒乞假部彙疏上奉

特旨槩予休致而先生名居首初請假也

聖祖謂諸詞臣不共官次于謁滋擾將有所處分大臣有知之者謂宜少緩先生曰若以養親獲罪復何憾遂歸

世宗嗣位前休致者悉起用

大臣薦先生才與修明史至則條列纂修事宜上之摠裁并示同館諸君皆唯唯議以全史之半相屬先生度諸公終不能行其志分纂仁宗朝紀傳彙具復投牒歸時房師桐城張公方得政暨同里蔣文肅公固留之許以推挽先生對曰即官如老

師亦非某所願二公乃止家居十餘年及今

上初元發號施令民氣和樂先生曰吾其庶覲德化之成乎就職半載會遍試詞臣仍予休致通籍卅餘年立朝不滿一考意泊如也先生始浮湛里中縱酒不羈已乃折節自勵然磊落俊爽引義慷慨與時俗脂韋干進之習鑿枘難合其見幾明決固有大過人者惜乎未獲施於用也初昌化公歿於官先生奉太宜人萬里扶柩歸暨祖母葉太孺人下世遺貲讓不取苛慝潛消本支益睦先後執

喪及葬立祠宇共祭祀具有儀則居鄉久凡有關
邑中利病者必向當事侃侃言之賴先生幹旋者
甚多其於文字尤有天稟初習舉子業崑山徐司
寇會課輒居前列至十六歲所為文已為人借刻
及在海外早夜精思文格益進何義門先生尤所
咨賞熟於史事漢唐宋事迹與其治忽之幾皆能
疏舉晚而學易頗有所得為古文詞波瀾意匠最
近廬陵然不規規形似今所存二百篇許易箒前
手自刪定者也余在都與太常為古道交最深歸

里後見先生精神如少壯時心氣益和平杯酒相
邀必勸盡歡閒談及經史娓娓不倦方意里開過
從藉以析疑解惑而先生遽病且不起矣悲夫先
生生於康熙某年月日卒於乾隆某年月日以
萬壽覃恩加一級階承德郎配俞氏吳縣丞諱健
說女封安人性賢明事姑以敬養佐治家有法度
年五十六前卒子二承和承勛俱太學生女三一
適諸生王來節一適太學生趙尊光一適諸生郭
兆蓀孫五壘塿墀塏墉女孫一以今年月日葬先

生於大河之新阡承和等奉其叔父太常所撰行
述謁銘於余同里後進不敢以不文辭銘曰
維昌化公學者所尊位不稱德乃耀後昆英英先
生少挺頭角肆力於文汗瀾卓蹕詞垣再入人樂
久居先生曰嘻賦我遂初拍浮酒船徜徉山水時
或直言以衛桑梓吁嗟先生與世超然謂宜難老
隕也忽焉有文在篋可以不朽我銘其藏徵諸永
久

陳少章先生墓誌銘

吾吳昔多博聞好古砥節勵行之碩儒 本朝百
年來位不大而名最著者則有義門何先生何先
生及門無慮數百人其最相契如晦翁之於蔡季
通呼為老友者是為少章陳先生自何先生歿後
先生獨以名德見推為中吳文獻之重輕者幾二
十年乾隆十二年十月十三日以疾卒於家典型
凋謝遠近為之嗟嘆卜葬有日故人門弟子咸謂
先生有道而文宜按古私謚之義謚曰文道先生
其孤具狀徵銘於余按狀先生諱景雲少章其字

先世家常熟代有聞人所謂河東陳氏也自曾大
父天麟始遷郡城大父明義喜藏書深禪理多與
明季遺民故老游父治昌慷慨尚義拯人之急母
朱氏孺人先生生而穎異初就塾時同塾諸兒所
課皆能背誦年十七睢州湯文正公撫吳試士拔
置第一十九從義門先生游益講求通儒之學窮
究經史晝夜無間學遂大殖父喪服闋補吳江縣
學生康熙癸酉試京兆不售而歸再至京館藩邸
三年復辭歸時年甫四十以母老遂絕意宦遊後

藩邸再遣使敦促漕帥赫公命淮安守造廬延請
皆堅謝不赴比先生出處不苟之大畧也其為學
如飢渴之於飲食終日丹鉛不離手凡經史四部
書從源及委貫串井然地理制度考據尤詳下及
稗官說家無不綜覽而尤深於史學早歲溫公通
鑑畧能成誦前明三百年事談之更僕不倦若身
列其間能剖決其豪芒得失者為文章簡嚴有法
所著有讀書紀聞十二卷綱目辨誤四卷兩漢訂
誤五卷國志校誤三卷韓文校誤三卷柳文校誤

三卷文選校正三卷通鑑胡注正誤二卷紀元考
畧二卷文集四卷皆能有功前哲嘉惠後來其他
少時帖括之文及應聘所修通志等書非先生所
留意故不復紀也性孝友居父母憂每慟輒絕歲
時祭享必涕泗沾衣與人交有始終外和內剛不
因人熱所居老屋數楹朝齋暮鹽人不能堪處之
怡然晚歲名益高迹益晦終年杜門足不踏塵市
蓋先生視世絕少可語世亦鮮知之者所謂不食
之碩果讀書之種子豈與世之工鞿悅營華膺者

爭一時之得失哉享年七十有八配吳孺人吳江
兩司寇後諸生景槐女劬窮守約奉姑至孝雍正
十年先卒年五十子男二昇長洲縣學生黃中吳
縣學生入國子監女一歸國子生張爾樸孫男四
慶曾文雍文寬慶餘以是年十二月某日葬於吳
山北麓之新阡奉吳孺人祔黃中為人耿介博學
有文為先生克家子以余不能取容當世顧獨重
焉余雖不獲親炙先生然與其子交深且久遂不
敢以不文辭銘曰

惟道與文立德立言於時不偶於古獨肩彼富貴者磨滅忽焉先生有書後世永傳吳山之麓鬱鬱新阡我銘幽宮徵在萬年

跋

跋米元章墨蹟

昔人評米老書下筆痛快如駿馬斫陣健利難方然今世所有墨蹟大抵後人撫仿形迹似而精爽不存矣此卷穠纖相間墨采煥發勢極奔放而轉折圓勁自然合度信超邁入神之作也所書黃帝

堯舜符瑞語攷書譜及收藏諸錄俱不載當是祕府中物不知何時又出人間一瓢薛君博雅好古此帖歸之為得所矣

跋趙松雪畫蘭

松雪翁竹石墨蘭皆冠絕當時曩於京師見蕙蘭長卷神采索寞意其非真此幅蕭疏生動對之如有幽香襲人歎識筆畫道美尤非作偽者所能一瓢有此奇珍宜其游戲翰墨超然出塵也

跋董思翁臨顏魯公裴將軍詩橫卷

吳道子觀裴旻舞劍畢其畫一揮而成有若神助
弇州謂魯公送裴將軍詩筆勢雄強勁逸有一掣
萬鈞之力意其書此歌時親見裴之劍舞故能如
此思翁平生得力於顏今觀此卷使轉生動頓挫
有力放筆若一瀉千里堯褻處宛如屋漏痕又綃
本宜墨神采四射亦似有神助者魯公真蹟既不
可見此卷在今日亦希世之珍也

跋何義門摹樂毅論

董思翁言世傳樂毅論有梁摹唐摹之異淳熙祕

閣所刻為梁摹本其餘人間傳刻皆唐摹本思翁
又以梁摹白麻紙真蹟為新安吳生所有為恨今
觀義門先生所摹含道媚於淳古其歌側處似跋
而實駿與外間傳本絕異意即思翁所謂梁摹本
但未知當日所本者為淳熙祕閣耶抑白麻紙真
蹟耶先生於晉唐名蹟臨撫最多用功極深今殘
縑賸紙皆為世寶後生淺陋對之惟有讚歎而已

跋義門摹褚河南陰符經

河南陰符經小楷宋南渡後真蹟猶存樓攻媿跋

謂在三茅寧壽觀者是也近世所傳刻者多細瘦
失真義門先生此本筆畫純用正鋒結體完固直
入右軍之室宋潛溪謂登善初師永興晚法右軍
人徒見所書或與薛稷類者疑之不知先哲有兼
人之才作字初不拘一體張顛善草書至其小楷
極端謹有法觀登善者宜以是求之義門此書正
與潛溪論合蓋得褚公之深矣

良齋文集卷之四



